



Chalandamarz 2018



Ils 1. favrer 2018, ad es gövgia las 10.15. Bgers mats da la scoula a Zuoz cuorran our da scoula a posa. Els as ramassan sün piazza da scoula e cumainzan ün zieva l'oter a schlupper lur geischla. Tuns fich dad ots, tuns ch'èau nun od fich gurent. Hoz cumainza il temp dal Chalandamarz. Per me scu seguonda patruna da La Punt eir il stress da las preparaziuns. La prüma tschanteda da tuot ils patruns e dals chavals cumainza. Och persunas. Las lezchas vegnan spartidas. Organiser ün musicist, fer caramellas, cumprer la decoraziun per la sela da gimnastica pel ballin, organiser bütschellas ed auncha bgerun dapü es da fer. Eir a scoula cumainzan las prümas prouvas da chaunt. Ün fin duos dis l'eivna vo minchün cul tren in sieu cumün, per exerciter lo illa scoula primara las chanzuns. Eir las lecziuns da sot, chi haun lö illa chesa da scoula a Zuoz cumainzan. Lo imprendains nus cun duonna Del Negro differents pass da sot per il ballin. Il temp passa sveltischem e già bainbod es rivo ils 28 favrer. La prouva generela da chaunt ho lö hoz davant la chesa da scoula a La Punt. Tuot ils scolars da la primara as ramassan ed il prüm patrün sto davant no per diriger. Eir la prüma patruna sto davantvart per der il tun culla flöta.



1. marz, las 3:15. Eau, la prüma e la terza patruna stains sü ed ans preparains per il cortegi. A las quatter stuvains nus esser sün piazza, per ir insembel culs oters patruns a sclinger oura la glied. Fin a las 4:45 chaminains nus tres cumün e passains tar mincha chesa per sdasder a minchün. Zieva que giains a chesa tar la prüma patruna, per manger lo culazchun tuots insembel. Il tè ans s-choda sü darcho ed ils paunins ans daun la forza per il cortegi chi cumainza bainbod. A las 5:45 partins nus per ir darcho sün piazza cun nos char

da Chalandamarz. Ils duos chavalins stiran il char, inua cha bod tuot ils oters patrums tschauntan losur. Zieva cha vains alura miss in lingia ils iffaunts tenor grandezza da la s-chella, cumainza a las 6:00 finelmaing il Chalandamarz. Scu prüm as oda ün ot „S-chelleeee“ da nus patrums, alura s-chellan ils iffaunts cun tuot lur forza. Las tschinch chanzuns seguan. Fin a las nouv chaminains nus illa part sura dal cumün e chantains tar mincha chesa ün pêr chanzuns. Ils chavalins schloppan culla geischla e nus pisserains cha`ls iffaunts chaminan in üna lingia. Eir scha`d es fich fraid, d`he eau gust vi dal cortegi. A las nouv do que alura üna posa cha vains propi merito. Las bütschellas cha vains cumpro ed eir la tschiculatta choda - chi vegn preparada dals genituors dals patrums - gusta güsta cun quist fraid e cul bletsch da la naiv bainischem. Il rest da l`aunzmezdi passa fich svelt e nus ans chattains svelt darcho a scoula per manger gianter. Zieva cha vains güdo als iffaunts da trer oura lur s-chellas greivas, giodains nossa pasta choda. Il cortegi vo inavaunt a las 13:30. Nus giains uossa in direcziun da l`Alvra. Tuot ils patrums tschauntan sül char e nus ans laschans trer giò per via. Per furtüna es la temperatura uossa ün pöin pü ota e ad ho schmiss da naiver. Pervida quello passan eir las prossmas duos uras svelt. Vers las 15:15 essans nus rivos a la fin da nos cortegi. Las caramellas cha nus vains fat, scumpartins uossa e dains a minch` iffaunt chi d`eira tiers al cortegi ün paquetin. Per nus patrums vo il di aunch` ün pô inavaunt. Nus giains giò`n scoula inua cha`ns inscuntrains cun duonna Olinda Hayer e duonna Esther Troxler, cha`ns haun güdo tar las preparaziuns, per quinter ils raps cha vains piglio aint düraunt il di. Nus essans cuntaints dad avoir ramasso, eir cun quista trid`ora, circa 2700 francs. Ün di bel ma eir fich stantus es passo. Eau vegn a chesa, fatsch üna duscha choda e giod il rest da la saira illa stüva choda.



Sanda, 13:30, darcho ans chattains tuots insembel. Quista vouta in sela da gimnastica, per preparar quella per il prossem di pel ballin. Tuots güdan ed as daun fadia da lascher garder oura quista sela grischa e trista scu üna sela da festa. Fin a las 16:30 essans nus landervi. La fadia as ho però rendida. La sela es pronta per il prossem di.

Hoz es dumengia, eau am fatsch güsta sün via aint il restorant Müsella, il restorant da mieus genituors. Lo mangiains nus patrums e las magistras da la scoula primara gianter. A do antipasti per tuots. Zieva ch'essans cuort aunz il schlupper, ans fains sün via a chesa tar la terza patruona. Lo spetta üna cuaffösa sün nus. Ella ans fo bellas marüschlas ed ans do sü ün pô bellet. A las 16:30 essans tuots och, trat aint bel, aint in nossa bella sela da gymnastica. La saira passa svelto, nus vains bger plaschair e sutains. Nus guardains eir ils duos teaters, da la scouline e da la prüma e sefuonda classa chi sun fich bellins. Per ils iffaunts e pels genituors ho la festa üna finischiun a las 23:00. Nus patrums ed eir la giuventüna sutains aunch'inauunt fin a mezzanot. Ad es las 24:00 il ballin es uossa a fin eir per nus. Scu ultima lavur per quist di stuvains nus uoss'auucha rumir sü la sela. Cun que cha tuots güdan fich bain essans già a fin zieva 45 minuts. L'unic impissamaint es uossa noss lets chodins chi spettan sün nus. Eau chamin a chesa e croud alura staungla scu cha sun subit in ün sön profund.



Quist d'eira mieu ultim Chalandamarz ma eir mieu pü bel. Eau d'he gieu gust da surpiglier la respunsabilitè sur da qualchosa uschè important per nossa vschinauucha. Eau sun eir fich superbgia da nus tuots. Dals patrums e dals chavalins, cha nus essans rivos dad organiser tuot uschè bain, e ch'essans gniesus a bröch cul poch temp cha vaivans. Per me es il Chalandamarz üna tradiziun bella, tuots as radunan in quist temp ed il ballin es eir adüna qualchosa fich bel. Eir sch'eu nu d'eir adüna fich cuntainta ils ultims och ans, da stuvair chaminer intuorn cun üna s-chella greiva tuot il di, uossa suni listess persvasa cha quista tradiziun fo sen e cha que es eir üna buna variaziun da l'an scolastic. Nus vaivans quist an ün fich bel temp insembel, ün temp ch'eu m'algurdaugia eir auncha in bgers ans.